

四庫全書

集部

欽定四庫全書

集部

文忠集卷八十三
四

詳校官原吉_臣李傅熊

主事_臣呂雲棟覆勘

總校官進士_臣楊懋珩

校對官學正_臣李巖

謄錄監生_臣沈立銘

欽定四庫全書

文忠集卷八十三

省齋別稿三

宋 周必大 撰

青詞 功德疏

疏文

並代作

青詞

外舅設醮青詞

戊寅立春

人生總總捨妙道以奚依天網恢恢視至誠而則格稽
首望層霄之表洗心陳一介之愚伏念臣某等並以冥

頑仰資覆憐閱歲月日時之久善無聞焉凡行藏視履
之間罪固多矣運適逢於惡弱家寢失於平康居懷臨
深履薄之憂敢緩跼厚踏高之懇迎春陽之開動哀羽
士以薰脩縉琅函瓊笈之寶書延金闕玉京之飈馭伏
望寸誠昭徹列聖監觀貸其既往之愆開以自新之路
福莫長乎無禍倘蒙大造之曲成吉不僭而在人誓與
閣門而共勉

建康府為皇太后設醮青詞

巳卯

慶集慈闈方介萬年之永時當秋令稍愆六氣之和聖
神正切於問安臣子當勤於致禱肅哀淨侶祇被崇壇
諷三洞之瓊章延九霄之飈馭式憑道蔭仰贊坤儀伏
願上帝儲休萬靈介祉衍椿齡於南極輳藥喜於東朝
同金母之長生後天而老副魯人之善祝俾壽而藏

茅山 已卯

壽祉無疆方隆坤載節宣或爽未格時蘇眷惟句曲之
山夙號列真之宅仰體聖神之意俯殫方國之誠祇按

仙科肅邀羽士琅函瓊笈啓三洞之靈篇風馬雲車延
九天之法駕曲盡荐繁之禮異臻勿藥之功伏願上帝
監觀寸誠昭徹來善祥於霄極介景福於慈闈孝莫大
於親寧上副九重之願天必從於人欲下符四表之心

徐憲設醮青詞

己卯四月

死生有命固脩短之難逃父子主恩忍幽明之遽隔念
逝水莫回於下地惟真科可籲於上天不勝駒犢之情
輒効潢汙之荐伏念臣某次男某未登弱冠忽染沉疴

雖竊深惟疾之憂尚庶幾勿藥之喜豈期不淑卒至云
亡恍惚四旬疑聲容之猶在冥茫厚夜痛體魄之安歸
深惟此生夭折之由大懼宿世愆尤之積欲圖拯拔必
假薰脩叩絳闕而被壇場按赤文而陳簡錄肅延淨侶
諷三洞之靈章廣設華燈破九幽之惡趣式哀衆善少
濟冥塗伏願宵極鑒觀飈游降格憫臣心之懇切許臣
子以超昇罪刊黑簿之中魂越朱陵之上更憑妙道結
未了之因緣誓與合門戴無窮之造化

金陵府治求雨青詞

同前

旱而欲雨在衆庶以皆然窮乃呼天豈守臣之敢緩惟
金陵之巨屏寔江表之通都師旅雲屯常艱於豐稔室
廬櫛比尤畏於鬱攸迺自三春以來暨於首夏之際既
久愆於膏澤仍屢困於融風農末俱憂公私告病雖曲
盡祈求之禮殊未知霑足之期自非請命於穹蒼何以
救民於塗炭用涓穀旦祇被靈壇哀淨侶而演瓊章按
真科而陳菲荐伏願俯垂淵鑒曲軫鴻慈大施三日之

霖亟解一方之厄金穰可望既無艱食之虞火沴自捐
咸有奠居之樂敢忘飭勵仰荅生成

方卿元日設醮青詞

庚辰

四序更端甫臨於元命九霄在望輒控於愚衷臣以駕
材夙資鴻蔭陰陽默運條甲子之一周歲日俱新適庚
辰之並紀即官居而洒掃遵道範以熏修稽首歸誠齋
心謝過冀蒼穹之下濟俾丹懇之上通慶集親庭常保
康寧之福身安仕路永逃瘵曠之愆用誓金石之心仰荅

乾坤之造

郭元嘉設黃錄青詞

物皆有死惟短折則可哀人孰無情在弟昆為尤切眷
言同氣脩歷多艱雖一第之成名幾十年之不調僅霑
寸祿遽迫大期由宿生罪垢之弗除且今世愆尤之重
積自貽伊咎遂隕其生不勝手足之悲輒効潢汙之荐
投誠簡籙請命穹蒼仰繫覆幬之仁俯濟沉冥之苦天
倫已矣悼友愛之莫伸地戶恍兮惟超升之是望

又設醮青詞

無微不達螻蟻之至情有感必通乾坤之大造伏念臣
雖依道錄未脫世塵昨因伉儷之私嘗啟熏修之願偶
緣多故頗致遷延逮因宿疴愈懷兢畏召集黃冠之侶
恪遵清醮之儀冀贖前愆且徵後福舉室倘臻於康泰
終身永奉於高真

尚氏姊本命日設醮青詞

乙酉十二月二十五日

天無不覆其大難名人有所求惟誠易感嗟稟生之多

厄嬰痼疾者積年勢乍已而復加藥屢更而未効豈涉
世動違於禁忌獲戾如斯抑宿生多積於愆尤貽災以
此惟道蔭有祈禳之理惟真科開懺謝之途適臨元命
之辰密應新春之候輒殫悃虔致熏修雖上穹之聽
蓋高然匹婦之情可達冀永蘇於病質誓仰戴於鴻私

十三弟設醮青詞

庚戌夏

罪愆增積久獲戾於神明限數災屯遂纏疴於床枕既
知悔懼敢怠祈禳仰祈鴻造之監觀俯念微生之困殆

貸其往咎許以新圖早收藥石之功獲保桑榆之景

功德疏

乾龍節功德疏八首

戊寅

正陽紀月來瑞乙之嘉祥薄海望雲啓飛龍之令節不
致叢霄之禱曷殫方國之誠孝慈淵聖皇帝陛下伏願
誕受天休函蒙帝祉脫三十年之否運回一萬里之安
輿享福康寧遠邁人皇之上壽願神閒燕永觀宣后之

中興

麥秋應候夙開夢日之祥蒙夏傾心遙致后天之祝叩
金闕玉京之境縉琅函瓊笈之書伏願上帝儲休三靈
介祉五百里之荒服亟返迷塗八千歲之大椿更隆睿筭
長發其祥當首夏清和之候誕彌厥月罄多方頌禱
之誠望金闕於九霄演瓊章於三洞伏願兩儀克相萬
福永膺俯順衆心輟瑤池之西宴仰憑道蔭自赤水以
南歸

夢日儲休早應羣龍之集望雲祝聖共祈八駿之歸祇

叩清都虔伸丹懇伏願函蒙多祉誕受殊祥歷三紀而
狩窮荒既脩常於險阻錫萬年而歸中國期永享於道
遙

南訛初秩夙聞里社之鳴北狩雖遙敢廢封人之祝肆
稽舊典高詠靈篇伏願妙道扶持清躬燕預民之所欲
祈速返於鸞輿天且弗違更茂延於鴻筭

長發其祥適在清和之候誕彌厥月預伸頌禱之誠即
金界之淨坊演貝多之祕曲伏願壽同無量福過大千

俯順衆心輒瑤池之西宴仰憑佛力自赤水以南歸
正陽紀月甲觀開祥聖若宣尼尚處九夷之陋誠同漢
岳遙伸萬歲之呼伏願十力證知三靈孚佑必得其壽
如沙劫之難窮式邁其歸等佛身之無碍

瑞乙應期昔啓聖神之運飛龍紀節今逢震夙之期式
瞻滿月之容遙致後天之祝伏願乾坤協佑屯否潛消
十一月之朔巡早回虞帝萬千歲之眉壽遠邁魯侯

天中節功德疏八首

同前

日永蒼龍正火德熾昌之候星流華渚叶真人震夙之
期虔修最上之乘仰贊方增之壽皇帝陛下伏願脩膺
純嘏誕保洪基怙冒羣生等慈雲而徧覆照臨四海與
佛日以常中

猗蘭紀瑞聖神膺申命之休貝葉繙經夷夏祝降年之
福既預保釐之列彌勤歸報之誠伏願德茂日新福臻
時邁寶圖寅御聰明睿智以有臨玉厯增延算數譬喻不
能及

景風應律序已正於朱明飛電騰輝符有開於赤帝欲
罄延長之禱敢祈調御之師伏願誕保鴻休溥將駿命
清蹕而朝萬宇永居宸極之尊後天而奉三光常奉慈闈
之養

帝圖有永仰上聖之膺期佛力無邊紓下情而致禱集
龍天之妙勝裨海岳之深崇恭願舜日光昭堯雲布護
巧歷莫推其筭數多男更茂於本支與國咸休常奉慈
闈之養因民所利俾同壽域之躋

轉運司
戊寅

里社夙鳴際千齡而啓聖潮音普震馨九有以祈年矧
將命於和門宜輸誠於梵刹伏願佛身常住僧劫難窮
為大法王永副山靈之託作百神主常膺嵩岳之呼

天純佑命固已格於延鴻民懷有仁自難忘於頌禱集
祇園之淨侶慶甲觀之昌辰伏願乾健時行豐亨久照
商后嚴恭而自度永觀帝德之敷周王安樂以延年坐
擁天休之至

虹渚流光啓神聖挺生之旦鷲峯致禱罄華夷歸報之

心恭願如日照臨體天覆憐壽考越萬年之久子孫開
千億之繁夏清冬溫常奉東朝之養丁纏丙度永占南
極之祥

總領所
已卯

猗蘭紀瑞當誕彌厥月之期貝葉繙經致於萬斯年之
祝式哀衆善仰贊中興之願乾健常行離明久照四大而
王居一并包有截之區五福以壽為先增衍無疆之數

轉運司
已卯

會慶節疏三首

三省例委撰
壬午

開啓

帝立子以生商適臨良月民同心而戴舜初紀誕辰虔
修最上之乘仰贊方增之壽皇帝陛下伏願乾行不息
離照常中成巍巍蕩蕩之功衍赫赫炎炎之祚邇安遠
至垂裳觀萬國之朝地久天長畫衮奉二親之養

滿散

帝圖有永慶上聖之膺期佛力無邊紓下誠而致禱已
集龍天之妙勝更度海岳之深崇皇帝陛下伏願誕保

全
卷八十三
洪基備膺純嘏九州四海皆底貢於端闈億載萬年永
稱觴於德壽

功德疏

重華協於帝紀會慶之嘉辰衆美効之君罄羣臣之善
頌既家國值非常之喜宜乾坤儲莫大之休皇帝陛下
伏願坐振皇威益恢孝治以盛德而一華夷之統以至
尊而承父母之顏轉聖王之四輪咸休天覆歷賢劫之
千佛永保君臨

疏文

皇太后服藥蔣山疏文

己卯

壽祉無疆方隆坤載節宣或垂未格時和眷鍾阜之精
藍實能仁之勝地仰體九重之意俯殫萬國之誠設淨
供於人天集殊因乎梵釋冀憑慧力速臻藥石之功益
永徽音更茂松椿之壽

皇太后服藥赦書賽諸廟祝文

己卯

恭惟聖天子以舜文之孝方問安於東朝爰霑湛恩徧

秩羣祀庶資陰相共介康寧願延萬壽之期永受九重之養

建康府為皇太后舉哀疏文 六首已外

變鍾長樂條聞坤載之傾悲動含生咸切母懷之慕式披梵典恭布哀誠大行太后伏願頓悟真如圓成妙果翟車縹緲亟游極樂之方鹿苑逍遙更結摩耶之侶

駝馱遐升無復慈闈之啓鷲峯精禱敢忘宜福之祈恭仗佛乘仰酬坤載伏願一真不昧萬行常圓同佛母之

在天永居兜率因女身而證道有若文殊

坤儀厭代莫延中壽之期孺慕興哀頓失東朝之恃不
資釋典曷助仙游伏願悟五蘊之皆空湛六塵而不染
由法雲地登正覺之道場乘般若舟到菩提之彼岸

輶車既闕永虛長樂之朝貝葉可翻仰扣大雄之坐式
資妙果用展哀悰伏愿頓悟無生常除有漏三山已隔
莫瞻駮駕之游十地非遥願值龍華之會

東朝厭世共悲大地之傾西竺繙經爰致普天之禱庶

憑法力仰助仙游伏願境悟空花功成妙果徽音常在
如夜月之印潭真諦是依乘慈航而濟岸

長樂告終倏嘆母儀之隔綿區奉諱共懷坤育之恩恭
修最上之乘仰助遐升之路伏願觀身如幻了世無常
密仗真詮既坐超於十地翕臻冥福更垂祐於六宮

請寶公祈雨疏文

己卯四月三日

自春及夏以愆膏澤之施若吏與民咸有旱乾之患雖
靈祠之徧走迄誠意之未孚仰惟無礙之慈悲夙副有

生之願欲敢勤象駕還顧法筵俾黔黎共罄於瞻依庶
哀憫曲垂於亟抃伏願至仁易感洪誓不違出慈雲鍾
阜之間隨車而至霈法雨秦淮之上及物無遺永言歸
饗之心全賴生成之賜

祈雨雪文三首

未祈禱間得雪
遂不用已矣

道觀

天覆羣生禱祈必應時臨穹臘潤澤偶愆麩麥可虞癘
疵或作祗叩博臨之鑿異垂下濟之仁呼風雲於朝夕

之間霈雨雪於冬春之際庶豐年之協應致沴氣之潛消誓竭微誠仰酬洪造

佛寺

歲云莫矣適困常暘雨以潤之正須惠澤用竭一心之懇式瞻雨足之尊惟六出之花繽紛來下則兩岐之麥秀實可期仰繫無碍之慈速副有生之望

寶公塔

豐年所繫皆卜於冬春嗣歲將興尚愆於雨雪敢歸誠

於鍾阜用徼福於金容瞻彼慈雲願散彌天之潤擴茲
慧力亟書平地之祥惟二麥之無憂則一圻之有賴

文忠集卷八十三

欽定四庫全書

文忠集卷八十四 省齋別稿四

宋 周必大 撰

啓一 並代作

謝寧執啓

以下十九篇代外舅
紹興二十六年

假以近邦已載陶鎔之賜縮其遠次益銜造化之恩懷
組綬以於征見吏民而伊始伏念某天資椎鈍地望卑
平識非五總之龜學止一班之豹難辛官牒兢畏官箴

謂我朱愚人嘆南榮之智為官拓落客騰揚子之嘲十年陪鴛序之聯終日負鵜梁之愧力上投閑之請遽叨共理之除由大鈞方播於無垠故小子亦容於有造遭塗浹日及境宣風將何施設於教條惟在奉承於法令夙宵自省僥冒為多茲蓋伏遇某官感會三辰昭明百度密勿梟夔之任弼諧堯舜之君橐籥含生罄邇遐而畢遂權衡多士隨輕重以皆平遂致妄庸亦塵任使惟是桐川之壤未遙楓陛之朝訟簡刑清雖曰庸材之可

勉民貧地狹奈何經費之不充方當涖職之初預積瘵
官之懼願少寬於筮榮庶自竭於疲駑狄山居一障之
間既蒙優假嚴助奉三年之計更賴生成過此以還未
知所措

與江東張帥啓

三徑就荒未決歸田之計一麾出守誤叨乘障之恩已
諏龜卜之辰祇佩魚符之寵伏念某學雖有志才不逮
人少也孜孜妄冀事功之立老而碌碌但慙廩祿之糜

昨叅風憲之糾繩謬贊露門之誦說自知無補力丐投
閒荷上聖之曲怜假附庸而共理幸居巡管庶追譴訶
恭惟某官性兼忠孝之資世受天人之學蚤由一德歷
事三朝紫微屢告於辰猷青瑣旋升於夕拜鷄翹豹尾
六卿居法從之光井鉞參旗萬里折遐衝之侮久袖經
綸之手益勤啓沃之心符刻玉麟暫付陪都之簪鼎辭
金鉉即遊揆路之沙某猥以孤蹤仰依巨蔭惟是桐川
之偏壘號為江表之陋邦財賦匱窮封圻褊小絕長補

短尚不足於平時送故迎新矧數更於長吏深虞譴薄
坐致顛隳正資大府之教條用作屬城之矜式居如何
武諒無赫赫之稱疎若班超願展平平之榮歸依之至
敷述奚周

徐憲頌德

恭惟某官奧學邁倫清徽表世奮勵才猷之茂踐揚中
外之多弼寺即曹最為舊德州麾使驛迭奏新功茲圖
壽俊之賢暫付祥刑之寄綠扉鞠草既仰助於好生紫

橐持荷諒旋膺於促名置為公論匪曰諛言某猥以孤
蹤仰依巨蔭惟是桐川之偏壘號為江表之陋邦財賦
匱窮封圻褊小絕長補短尚不足於平時送故迎新矧
數更於長吏深虞譴薄坐致顛隳惟外臺有以庇之則
屬城免於戾矣素秋淒肅玉節光華願調六氣之和坐
使百祥之合

周漕誦德

恭惟某官國器宏深天資茂粹問學造聖人之旨詞章

為王度之華早著英聲踐周行而最久徧臨劇部論膚
使以推先茲疇澄按之庸荐付轉輸之寄方睿哲益新
於施設宜者明首被於褒遷佇聞芝檢之頌入預荷囊
之挈亶為公論匪曰諛言

下同
提刑

葉漕頌德

恭惟某官國器宏深天資茂粹奧學究聖人之旨英詞
追作者之風比協廷僉亟頌驛名奉常議禮方躋清切
之途便殿矢模儀奉皇華之遣錫名駒於天廡寓美職

於瀛州欽聞攬轡之初已著埋輪之譽行歸表著高步

禁嚴

下同
提刑

徐總領頌德

恭惟某官國器宏深天資茂粹識前言往行以蓄其德
有令問廣譽而施諸身早有奮於才猷嘗徧儀於中外
璧琮無玷愈久益新松柏有心雖寒不改復綴九卿之
少列獨司萬旅之餘糧佇褒寵於顯庸即超遷於法從
是為公論匪曰諛言

下同
提刑

呂提舉誦德

恭惟某官奧學承家清徽表世襲相門之舊德結黼座
之深知洊歷劇繁益隆譽處比協搢紳之望擢升軺傳
之華足國裕民功既成於斂散摘山煮海効復見於富
饒佇聞芝檢之頒入預荷囊之挈是為公論匪曰諛言
下同提刑

兼權臨安府戶部韓尚書啓

背觚稜而北去方返寒鄉紆組綬以西來遽臨偏壘未

知條教有愧吏民伏念某殖學淺膚稟生閭阨少無可
取真同樗散以棗昏老復何能甘作鼠跽而麀怯昨收
朝蹟旋拜郡符之官無五百里之遙竊食預二千石之
列雖民貧而地狹幸訟簡而刑清於此庇身寔為過望
茲蓋伏遇某官英資邁往精識絕倫總賦地官教周卿
之禮樂剌繁天邑用漢尹之春秋顧政路之將登惟人
材之務進有如孤拙亦賜吹噓某敢不深體上恩免勤
吏事癸姦摘伏縱無一日之長宣化承流願奉三年之

計

權樞密都承旨中書王舍人啓

杜門掃軌瓜未及於齊丘便道之官竹已分於漢郡反
求諸已有愧於心伏念某襪線無長鬢絲易老方羣賢
之並進競樂居中顧弱質之無庸力祈補外分合投閒
而置散恩容宣化以承流惟是桐川介於江表雖民貧
地狹在薄材綿力以難勝然政舉人存有善教流風之
可法孤蹤自省徼幸何多茲蓋伏遇某官德配先民文

傳正法贊謨右府宣聖神道德之威演誥西廂鼓天地
中和之氣每推公論力獎遺才故雖朽鈍之餘亦在吹
噓之數某敢不勉思未至祈稱所蒙游办發硯諒難追
於古訓伐柯取則期勉跂於前規

湯中丞啓

假以近邦已戴提撕之厚縮其遠次益知成就之深紆
組綬以於征見吏民而伊始伏念某立身至苦秉德甚
涼每惟骨相之屯敢有功名之望郎省已成於白首憲

臺濫綴於清班。敏歲周推。顏人後始也。羣公雜進。枘
方不可以入圓。及乎衆正彙征。器小復難於用。大推之
理數允矣。竒窮尚分東方千騎之麾。實賴中流一壺之
賜。矧茲桐水未遠。楓宸雖地狹。民貧在綿。力薄材而難
彊。然人存正舉。有流風善教之可師。夙夜以思。叨踰為
甚。此蓋伏遇某官氣全剛。大道備中和。歲寒不改於松
青。風疾始知於草勁。提綱柏寺既宿。槃之頓除。秉政槐
庭。矜元功之茂立。每扶國是。坐政臺評。遂容蹠蹕之縱。猶

在馳驅之數某敢不云云

下同王舍人

凌正言啓

上同江東張帥

伏念某稟生閩阨殖學淺膚棲遲名位之卑荏

苒星霜之易蘭省殆成於白首柏庭濫綴於清班黽勉
歲周摧頽人後方羣公之並進可謂得時顧朽質以自
慚力祈補外分合投閒而置散恩容宣化以承流載惟
僥冒之深必有夤緣之自此蓋伏遇某官氣和而粹道
廣而周居然中坦而外莊不以澄清而撓濁烏臺三院

甫揚直諒之聲騎省七人旋賴彌縫之益俯憐樗櫟夙
忝金蘭每曲賜於揄揚致獲安於奇拙居如何武諒無赫
赫之稱踈若班超願展平平之策

褚臺簿

三逕就荒未決歸田之計一麾出守誤叨乘障之恩自
惟襪線之無長加以髻絲之易老投閑置散理所當然
宣化承流斯為過矣載省叨踰之自寧無獎借之由茲
蓋伏遇某官問學粹精風猷懿邁久儀仕路人皆嘆於

進難擢寘臺僚上獨嗟於見晚每推公論仰助清朝致
茲朽鈍之餘亦在吹噓之數

下同前

宣州樓樞密啓

輕萬戶以識韓早諧望履施餘波而及晉今幸依仁甫

視印章虔脩竿牘伏念某學雖有志

下同江東張帥

假附庸而

共理布寬條而有俶託大芑以知歸恭惟某官博厚而
疏通溫恭而剛毅起千年之絕學獨步儒林振一代之
脩名偏儀禁路翰苑早敷於邦號樞庭再本於兵機久

安香火之祠高袖經綸之手方睿主益新於庶政擇輔
藩分命於元臣歛大惠於一州錫康侯於三接圖任舊
人而共政佇慰民瞻咸有一德以享天永符帝賚某密
瞻上府獲在下風為滕薛之大夫已踰分量親龔黃之
善政願奉規模過此以還未知所措

答陳國正

天麟啓

昔年幸會親觀淡墨之名晚歲倦游坐遠金閨之序豈
謂不遺衰朽遠矧緘滕方塵容俗狀之可憎驚墨妙筆

精之創見執謙良甚懷感至深伏惟某官道本師傅詞
皆已出豹澤靡容於隱霧鴻毛果見於遇風帝席夜前
對宣室鬼神之間學宮晨入誨諸生行業之勤諒無歲
月之淹別奉絲綸之渥蘭臺譔著固將平步以登馬玉
殿論思蓋亦厯階而升耳願慎寶調之術式符頌祝之私
其在悃悃曷勝言諭

賀戶部王侍郎侯啓

趣朝天陸峻陟地官帝命有光人言無間恭以某官高

文駿發懿行淳深奮才猷於百執之間備侍從於中興
之始惟時心計尤東睿知故四明方樂於香凝而九賦
復煩於鞭算昔漢嘗尊於計相至唐彌重於度支豈徒
司金穀之繁抑以養鈞衡之望稍著裕民之効即膺共
政之除某早辱言揚欣聞名拜屬佩左符之竹阻陪右
席之賓瞻頌於中敷宣罔既

賀禮部卓侍郎次膺啓

名自侯藩擢升禁從諸儒改觀共欣掌禮之得人庶俗

何知亦喜正臣之在位恭惟某官持心本恕守道不回
早見知萬乘之君期無負平生之學進居諫省一言必
務於興邦退領祠宮三已莫窺於愠色身居鄱水名重
泰山逮隆當宁之思連奉賜環之命辰猷既告夜席盡
前咨伯汝作秩宗姑假塗於簪橐暨湯咸有一德即當
路於鈞衡某僻守小邦逖聞成命莫遂登門之願敢稽
贊喜之書頌詠於中敷陳奚究

賀提舉修書官万俟右相轉官加食邑啓

成書長樂宣制正衞冠五等以疏封躐二階而進秩僉
言允穆注意加隆恭惟某官碩大而光明直方而寬厚
異稟蚤符於帝賚英猷久峻於民瞻丁溥天綏靖之期
宅右揆辨章之任既中外咸安於少事宜君臣俱樂於
無為惟茲駟馭之還尚闕鴻儒之紀肆煩茂宰親總宏
綱方和鉛舐筆以編摩俄緯典敷華而明備涓之穀旦
導以盛容薄昭迎后之儀揭日星而顯著虞舜慕親之
孝亘夷夏以流聞汗青恭寘於慈寧副墨仍藏於祕府

爰頒異數用答元功昔蕭曹居丞相之官初無聞於筆
削班馬擅史家之學第私紀於見聞豈如輔佐之賢榮
奉纂修之詔所載者非常之慶宜膺乎不次之恩豈為
家國之光華豈獨士夫之歆艷某身游大治耳屬上儀
拘綴銀符雖莫預班廷之數傾依玉鉉其敢忘賀履之
誠

賀進書禮儀使沈左相轉官加封邑啓

上同
方俟相

丁溥天綏靖之期宅左揆辨章之任既中外咸

安於少事宜君臣俱樂於無為惟茲駸馭之還尚闕鴻
儒之紀昨頒中詔俾輯奏篇書薄昭迎后之義以貽後
代顯虞舜慕親之孝不在斯文汗青恭寘於慈寧副墨
仍藏於秘府肆煩上宰親總盛容簪紳肅穆以前驅禮
無違者天日清明而顯相人皆仰之繫鉅典之克成殆
聖時之創見宜舉懋功之賞用酌領使之勞非崇資峻
陟無以示天眷之隆非書社陪敦無以慰國人之望甘
茂十官之取何足與稽張良萬戶之封固宜未艾某身

游大冶

下同
前

賀湯右相啓

紹興二十七年

金甌名啓玉鉉位崇制命一傳歡謠四起竊惟至治之
世必有非常之臣視君如腹心相王為左右用肩一德
永底多盤歷選時髦孰為舊德斗宮運神樞之柄既在
諸公之先上相處太微之庭宜應今日之拜恭惟某官
氣充高厚忠貫神明濟世之才愈汲而愈富許國之節
彌久而彌堅早由經緯之文親結聖神之眷精誠每竭

燥濕莫移故凡見諸有為率不負其所學垂紳正笏判
羣疑於片言偃武修文興長利於旋躔更化之際宣力
為多方時已安命相尤重民皆屬望久矣上亦虛心待
焉果副具瞻亟聞爰立談笑為治豈惟垂千載之規精
神折衝固可制四夷之命修禮樂以名和氣進賢能以
起治功三代之隆遂將載見兩漢而下夫何足云某愚
有寸誠老無他技虞翻骨相自嘆多屯陶令田園分甘
歸去茲值播釣之始尚懷為御之初望賓客之後塵雖

知邈爾採士民之公論不覺欣然瞻頌之誠云云

同前 代閩人書庫

光膺典冊進總機衡屹若明堂得棟梁而愈固浩然巨
浸賴舟楫以安行渙號播聞輿情閭閻竊以輔弼之任
古今所難咨四岳以奮庸匪內由於獨斷使百工而求
野或外盡於周詢豈知聰明睿知之君久眷碩大光明
之佐積年詳試一旦登庸既聲名素稔於縉緹宜望寔
交孚於華裔恭惟某官應期佐聖維岳炳靈游夏淵源

洞八索九丘之學卿雲黼黻雜四時五色之文蚤擢殊
科立登要路春官儀禮明夏商損益之宜翰苑代言繼
盤誥聲牙之作亟被九天之渥延登兩地之尊柄幹洪
樞運籌而坐帷幄烽沉紫塞挽河而洗甲兵寢隆巖石
之瞻以徯沙堤之築果贊元而入輔遂當路以奮庸方
且感一人特達之知慶千載難逢之會股肱盛世著蔡
羣疑飾庶事以鼎新措溥天於孟覆共欣聖主獲稷契
臯陶之良臣肯使太和在唐虞成周之盛際詩書所紀勲

業同歸某五斗為貧一官効智寢每懷於附鳳門屢幸
於登龍方此播鈞敢忘躍冶祐甫除八百之吏雖匪舊
知晉卿舉七十之家尚容筦庫

問候沈左相啓

以下代方總領
紹興二十八年九月

蒙霧而行每潤身於膏澤邈風以望頻矯首於門墻當
九秋尚杪之辰有萬寶告成之喜鼎梅久實和羹方賴
於商衡潭菊可食遐壽宜臻於漢相輒殫懇款仰詢寢
興恭惟某官正直秉彛誠明貫道窮精微於三聖學有

本原掩述作於兩京文皆典則自進隆於國棟卽茂立
於邦基獎拔羣材共翊休明之運彌綸庶務密庸造化
之功三台仰驗於色齊九鼎俯知於器重縉紳歌詠中
興有丙魏之聲旒冕注懷廣廈論唐虞之際克凝丕績
絕擬常倫伏念某塵慮煩襟譎材曲學曩值延登之旦
首膺特達之知如彼枯魚驟激西江之水譬諸部屋頓
延東井之光既蓬跡於郎闈仍總儲於軍壘黽勉粗殫
於駑駕叨踰終愧於鵜梁仰藉洪鈞尚逃司敗鷓鸞接

武雖寸步之不前鴻雁來賓顧尺書之敢緩其為瞻頌
罔罄名言

問候湯右相啓

含香錦帳身游坤北之鈞發軒轅門目注熒煌之座欽
想細旃議政廣業熙天茂隆旦奭之勲遂措成康之俗
神明所保福祿來同恭惟某官智蘊賢謨道先民覺以
聳壑凌雲之質柱石王庭以鏘金戛玉之文笙簧帝典
自峻參於機幄旋進執於宰衡雖鎮以無為孰測廟堂

之密勿然見諸行事足觀輔弼之規恢內馬百度之修
明外則羣王之綏靖大弔掛壁澄宵潛狼角之光嘉石
平民絕澗息禽遊之酷積為和氣散作謹謠方且進英
髦以共保洪基飾禮樂以助調元氣郊天祭地告厥
成功緯典敷華傳諸後世太平責塞小人道消某襪線
無長髻絲浸老牛溲馬勃辱採擇於醫師蟲臂鼠肝正
依棲於造化金莖露滑玉鉉羹調異益獲於寢興永上
符於眷注瞻祈倍極傾寫奚殫

賀王樞密啓

明詔揚廷元樞正位有常立武基聖神宥密之謀無競
維人成邦國安強之勢真儒益進多士同歡恭惟某官
道本誠明氣全剛大詩書執禮六經皆務於雅言直諒
多聞萬乘素推於益友騫翔久矣譽問藹然詞掖鑿坡
大冊高文之獨步經帷工尹昌言宏議之日聞自陟幾
廷愈攄廟略留侯佐漢功高三傑之中裴度輔唐名播
四夷之外擁軺出使仗節來歸有折衝厭難之勲無伐

善施勞之失況三軍五兵之運久此宣猷宜十行一札
之書茲焉進長寵數式隆於當宁恩章尤異於在廷既
用仲尼固知天下之無敵非如汲黯但使淮南之寢謀
某夙荷恩憐欣聞冊拜宏開沙館知多賀厦之人邈處
柳營獨阻登門之願其為馳頌實倍常情

賀吏部張尚書啓

寵錫綸言峻登文部任隆常伯獨專四選之權班冠從
臣允謂六官之長雖還舊物寔茂新恩恭惟某官學粹

而文高氣和而節勁早登禁路惓惓形憂國之言久歷
藩方疊疊盡愛民之意既宸心之妙簡亦輿論之素孚
雖告歸力上於囊封而趣名屢頒於邦渙游神琳館進
讀金華數朝士於正元春風屢改得世臣於故國喬木
猶存方將倚重於股肱茲用假塗於喉舌稽諸周制天
官同冢宰之名參以唐規政府總吏銓之事惟時重任
屬我老成某久託餘輝遂聞異數顧阻伸於慶禮實倍
激於懽悰

賀朱中丞啓

祇奉親除峻陞獨座絳騶清道一時欣覲於曠儀白簡
生風多士共觀於勁節恭惟某官性資誠慤局度方嚴
學窮六藝之源流文掃百家之鞏帙自登朝列即締主
知操挺松筠歷三冬而不改質堅金石經百鍊而愈精
已騰騎省之聲稱旋振烏臺之綱紀有猷必告無弊弗
除果膺非次之恩遂應九虛之選執法在端門之右是
亦假塗輔星明北斗之中即聞秉政理之必至人所共

期某屬奉使華阻於賓謁正臣得位既如鷓鴣之在天
善類歸心何畏豺狼之當路其為欣懌實倍等夷

問候葛侍郎

櫟社扶疎昔依仁於華省蓬心拳曲今結戀於朱門欽
惟賢哲之所臨密有神靈之來相內凝道妙外納時和
恭惟某官應物以俊明之資處躬以渾厚之德詞章峻
潔如東流赴海之莫磯問譽輝光若北斗麗天之可仰
掖垣掌制文部典銓世傳常袞之除書人服山公之啓

事謂合延登於黃閣云胡引去於清都結河山杖履之
緣作茗水龜魚之主冲襟逸興雖寢忘紫橐之舊游雅
望英聲當勉為蒼生而再起某久應襍被尚許濫巾蝶
夢空勞莫遂接辭之便魚書遠至少伸問訊之儀悃悞
所懷楮毫奚盡

賀何大諫啓

演誥鳳池升班騎省后從諫則聖式嘉啓沃之誠臣事
君以忠愈藉論思之益恭惟某官執德洪而信道篤見

善明而用心剛自擢冠於南宮即締知於北闕曩由六
察進列七人造膝惓惓補袞實同於山甫抗章纒纒引
裾何愧於辛毗爰從左掖之聯就正大坡之拜青蒲屢
仗旣旌入告之嘉猷紫橐峻持更應以虛之妙選佇疇
言績叅秉政幾某外奉使華遙聞褒制莫展陽城之拜
敢稽商皓之書欣頌交懷喻言奚究

賀都司諫啓

底績右垣升華左掖忠言廟上雖寄任之不移正色立

朝知班聯之愈峻恭惟某官文高典則學洞淵源挺渾
金璞玉之姿時皆景仰貞烈日嚴霜之操帝所親知名
居六察之官擢預七人之列風聲鯁峭屢開白獸之樽
諫紙縱橫脩著皂囊之疏式酬久次爰喜右遷臣事君以
忠補袞既彰於山甫后從諫則聖轉圜益顯於高皇
佇從耳目之司入踐股肱之任某屬縻使事阻造賓筵
仰賢哲之得時與士民而共慶其為欣頌曷罄敷陳

謝執政啓

代陳通判

戍期垂畢未瞻魏闕之觚稜詔旨中頒遽剖漢庭之符
竹顧牧民之寵厚知宰物之恩深伏念某智術迂愚官
游連蹇三銓列屬被亟襍以汰歸萬里觀風突甫黔而
報罷一投閒散屢改炎涼豈盛時獨棄於蒹管蓋薄命
動迎於墻壁欽惟先德傳清白之高風藐視後人敢磷
錙於素守傷哉貧也誰者憐之旣生范氏之塵瓶乏淵
明之粟晚叨起廢游歷游談章郡頻年坐對朝雲於南
浦臺城再歲飽聞夜鶴於北山居無可紀之勞寧冀就

遷之渥忽叨成命改付名邦方愧杲之依芙蓉而汎水
乃容高適出幕府以持麾之官雖後於瓜時揣分寔踰
於樗散茲蓋伏遇某官道隆先覺勲格皇天拳拳致主
之精忠汲汲求賢之美意衡量多士重輕無抄忽之差
澤潤羣生遐邇失焦枯之患欲廣聖神之德尤嚴師帥
之官何取妄庸亦忝任使某敢不愈堅末路靡負初心
戴稷契之殊知謹銘藏於茲日追龔黃之善政尚鞭榮
於他時過此以還未知所措



文忠集卷八十四

欽定四庫全書

集部

文忠集卷八十五
六

詳校官原吉臣李傅熊

主事臣呂雲棟覆勘

總校官進士臣楊懋珩

校對官學正臣李巖

騰錄監生臣沈立銘

欽定四庫全書

文忠集卷八十五

省齋別稿五

宋 周必大 撰

啓二

並代作

賀李漕植啓

以下代帥結
興二十九年

疏寵嚴宸觀風劇部除書誕布公議咸歸伏惟某官雅
望映時宏猷經遠剖符黜歛比聞報政之優易節湖陰
旋舉疇庸之典未周歲籥彌著治聲與其勞飛輓於遐

方孰若展施為於近地果膺褒詔改畀使華攬轡登車
暫屈澄清之寄持荷簪筆即躋侍從之班某幸以衰蹤
將依仁庇日俟前驅之至庶諧宿霧之披欣忭之私敷
陳罔既

賀江東陳憲啓

一札疏榮六條問俗畫衣冠而民不犯上既廣於好生
送禮樂而遠有光下咸爭於快覩恭惟某官明察秋毫
而行之以恕學周世用而濟之以謙雖靖共自守於班

聯而望實交孚於中外肆倚月卿之重來分星使之權
昔嘗司天下之平尚多游办今乃仗江圻之節寧有寬
民初聞繡斧之風馳已見旄倪之柏悅諒靡温於坐席
即歸侍於細旃某誤剖藩符實依臺庇周爰咨度遙知
四牡之勞惠然肯來冀慰一方之望

賀王樞密

誕頌帝則擢貳幾廷仰帷幄之得人知簪紳之交慶恭
惟某官才高而學博質厚而氣剛精忠自結於深知雅

望寢儀於近列代言翰苑詞章寧愧於常楊勸講露門
議論力窮於游夏方上聖益新於政化肆羣工並赴於
事功乃眷弼諧尤嚴宥密雖星低太白靡勞三傑借箸
之籌然樞運斗宮實贊七德安民之武克付本兵之寄
孰踰名世之賢某幸託洪鈞竦聞成渙屬藩符之拘綴
阻賓閣之進趨欣頌交懷叙陳奚既

回陳都官啓

外臺報政真館就閒既從香火之遊宜介神明之祉伏

惟某官性資端亮才必恢宏分符馳豈弟之稱攬轡著
澄清之効溪山行樂姑暫適於雅懷簪橐需賢即趣頒
於名節某欣聞弭蓋尚阻披雲方圖尺牘之修遽辱長
牋之貺其為感荷罔既敷陳

回陳同知除知院啓

誕頒宸綍進長籌帷兵本不移民瞻愈峻恭惟某官才
高而學邃志大而氣剛以精忠隆當宁之知以厚德洽
在廷之譽禁塗累歲屢殫告后之猷政路踰年力贊安

民之武宜膺大任遂正元樞方四夷稱都護之觴而中國偃靈臺之伯垂紳正笏魯何聲氣之勞出榮畫竒自有幾微之略既中外折衝之所繫宜聖神注意之加隆某竦聽郵傳幸依鈞播屬藩符之拘綴阻賓閣之進趨欣頌交懷叙陳奚既

賀宣州魏叅政

起從家食就領州麾印組一臨吏民交慶恭惟某官氣全剛大志蘊經綸與道卷舒三仕三已而奚恤逢辰休

顯一都一俞而有為正隆維石之瞻遽念急流之退雖
雅志自安於琳館而高名常在於金甌欲令赤舄之邁
歸先為蒼生而再起惟宛陵之奧壤寔江表之名藩既
風俗之素諳宜教條之易布溪山行樂方巾擇勝之車
老稚縱觀俄擁班春之旆諒靡溫於生席已亟築於堤
沙某久矣懷歸尚茲假守漳潮相接深慚政事之不同
虞號為鄰竊幸齒屑之為輔其為欣忭罔既敷陳

賀鎮江董知府

升華中祕擢守南徐綸綍初頒旄倪胥悅伏惟某官忠
存霸府譽冠時髦雖迴翔久試於外庸而東注不忘於
上聖昨奉楓廷之對亟叅蘭省之班逮出總於軍儲仍
就紆於州紱三年考績方稽虞氏之舊章滿歲為真姑
用漢京之盛典矧寓石渠之直彌增銅虎之光言念衰
蹤密依鄰庇跂棠陰之在望知河潤之旁霑欣幸居多
叙陳奚既

賀田開府啓

奉詔十行視儀三事式表旂常之績有光帶礪之盟伏
惟某官智勇兼資韜鈴洞貫自徹邊疆之警即宣江漢
之威登齋戒之壇既久頒於六纛陟尉安之府亦坐閱
於八年茲疇經武之庸併舉懋功之賞碧油紅旆不移
細柳之屯赤舄繡裳增換雲臺之像某遥霑河潤喜聽
廷揚曾尺牘之未脩辱雙魚之先逮其為欣悚難盡名

言

回柴叅議啓

拜命中朝贊謀外閭雖抑九霄之步實增十國之光伏
惟某官靜慎弗渝疏通無滯襲爵嘗聞於公社試才以
歷於宦途茲煩席上之珍來主幕中之辯度公之依淥
水衰蹤預有榮焉樂廣之善清談婉畫可無憂矣曾柔
緘之未布已華翰之先臨慰感兼深叙陳奚既

回吳漕啓

觀風底績易部示恩念寄委之加隆宜士夫之胥悅伏
惟某官器涵渾厚學造淵深才猷見於施為智略形於

議論比上歷陽之最就登淮甸之車建膺改命於鄰封
益表注懷於中禁去思來暮騰兩路之歌謠威浹惠宇
聳百城之畏愛竚奉綠綈之語入陪紫橐之游某以愧
瘵官尚叨換節迫於行邁雖不容雲霧之披辱在交承
恐未免粃糠之簸尚稽展慶遽辱惠音惟欣感之交懷
匪叙陳之可究

賀江東王提舉啓

代吳潛

膺時遴選為國外臺見九郡之吏民道一人之志慮伏

惟某官剛毅有守純明不欺輔之問學之淵源發以詞
章之黼黻叅華宗寺政績銓曹雖清路之滄更顧外庸
之未訖粵勤剖竹復賴乘軺總倉儲歛散之權幹山海
阜通之利民財既裕國用自饒言遠有光方聽皇華之
遣見知則悅即歌四牡之來某聯事雖新傾風惟舊鱗
鴻可致敢稽執訊之書原隰交馳行快披雲之睹其為
欣懌難盡名言

賀吳漕啓

代張帥

疏寵嚴宸改轅劇部除書誕布公議咸歸伏惟某官以
德潤身用儒飾吏承流宣化著美績於歷陽激濁揚清
藹休聲於淮右將趣賜環之名先頒易地之恩寄委加
隆眷知愈厚輶車載路方詢舊部之民風綵鷁橫江已
見新封之候吏諒靡淹於芳歲即歸挈於荷囊某幸以
衰蹤行依仁庇日俟前驅之至庶諧宿霧之披

回淮東朱總領

代張帥

足食轅門升班省戶公言無間使節有光伏惟某官毓

德粹醇稟資開敏維其時矣親承黼坐之知是以似之
克濟相家之美比較丞於九扈來總賦於三軍允惟心
計之優坐致邦財之裕迨茲踰歲果被陟明錦帳含香
姑歷堦而少進禁塗簪筆竚越次以殊遷某幸借鄰輝
欽聞褒詔曾尺書之未布辱疊璽之先臨欣悚交懷喻
言曷既

賀賀叅政啓

代總領

詔錫綠綈位登黃閣間兩社以為公輔助調鼎萬之和

有一德以享天心上炳杓魁之象傳聞所逮閭澤惟均
竊稽藝祖之宏模參考唐朝之舊制敷求英傑肇置疑
丞密次台躔禮秩僅餘於一等同升政路絲綸首拜於
二人共圖大器之安永底巨川之濟洪惟累聖並守成
規任至重則才寔難寵既深而選宜遴在昔率多於成
德於今尤擇於耆英國有人焉民胥悅矣恭惟某官學
關百聖望貫三朝直道而行養其氣以剛大古訓是式
尊所聞而高明方思皇多士如周后之時越圖任舊人

美商邦之政首頒名節擢實禁塗南宮以罄於論思東
省最高於封駁旋率三銓之屬進儀八座之聯虎殿侍
言冠諸儒之清選麟臺授簡成萬世之信書既劇繁華
要之徧更宜輔弼贊襄之有賴方且許身稷契致主勲
華疊疊周詢務旁招於俊乂孜孜入告庸上合於忠嘉
惟成功與日以俱新則置相指期而可待某聯榮卿寺
總賦師干大用得賢喜聽傳郵之命羣情交慶將遊播
物之鈞欣幸居多名言奚既

同前

代漕

誕布絲綸進居廊廟仰模乾度絜芒色於輔星俯視昕
朝叅班聯於揆路正臣登用善類懽愉竊觀致理之朝
慎擇爽邦之俊左師右保既資二相之變調前疑後丞
復賴四鄰之啓沃典謨所載勲績具存古我先王圖任
舊人而共政受天明命咸有一德以享心偉此道之復
興幸是身之親見恭惟某官精微而閱廓柔惠而直方
以經綸之學暢皇猷以黼黻之文鳴聖代究心典禮家

傳慶普之書篤志清高早慕季真之操會黃屋鼎新於
政紀宜紫泥趣召於儒臣踐歷春官周旋夕拜紬圖書
於石室冠講讀於金華直道不回豈惟揚近侍之職忠
言無隱固已有大臣之風况久典於吏銓實首儀於法
從大厦方須於杞梓巨川正倚於鯨鯢越從喉舌之司
擢寘股肱之任已新巖石共瞻赫赫之師行築沙堤式
望堂堂之相某充員漕輓託迹鈞陶雖遙扣閣之期喜
際迓衡之旦泰和在唐虞成周之世方符揚子之言聖

主得稷契臯陶之臣願上王褒之頌其為欣忭實倍等
倫

賀湯相遷左相啓

代總領九月

金甌載啓瑤札誕揚宜一德而無二心既著元臣之効統
百官而均四海遂登冢宰之官孚號遠傳懽謠四達竊
考帝王之盛悉資輔弼之賢有若成湯命仲虺而為左
相逮於周室尊公旦而師萬民漢則蕭何寔冠於臣隣
唐則如晦首登於政事蓋德隆者位不可以不極而功

大者任不可以不專必有宗工乃膺巨用恭惟某官才
繇帝賚道覺民先以經綸之學贊皇猷以黼黻之文鳴
聖世早攄可大之業入輔非常之君居多告后之謀猷
綽有濟時之勲業兵寢刑措盖元首明哉而股肱良哉
時和歲豐故百室盈止而婦子寧止矧賢能之並用且
禮樂之方興厥功茂焉庶事脩矣宜淵衷之妙簡躋元
輔以裁成仰契天心齊兩兩泰符之色俯從民望聳岩
岩維石之瞻某外總兵儲遯違英袞間寵頒於顯冊寶

倍激於歡悰敞東閣以延賢阻陪簪紱運大鈞而播物
正賴鑪錘欣躍於中指陳曷喻

同前

代吳潛

誕揚孚號進陟元台迪高后以康兆民久注淵衷之意
統百官而均四海式登冢宰之尊廊廟增光簪纓交慶
竊考迓衡之旦慎求當軸之賢惟吉士勵相我國家豈
特聖神之有賴用真儒無敵於天下實為華裔之具瞻
矧專魁柄於中朝獨炳台符於上象必契天人之望乃

膺典冊之頒恭惟某官道大而才高器閎而量遠文傳
正法與日月以增光識洞羣疑如著龜之先見早由德
進深結主知亟叅法從於甘泉旋列詞臣於翰苑屈燕
許於筆下蔚為王度之華得頗牧於禁中久借籌帷之
助逮正鈞衡之拜力調鼎鼐之和削浮費以具損德之
修堅鄰權以贊親仁之寶太平功備衆正路開一身獨
繫於重輕萬乘方資於啓沃庸陞左揆祇荅元勲異恩
疊進於文階真食益荒於書社九章赤舄聳上相之新

儀三公黑頭邁前人之盛事某幸逢亨會仰託洪鈞一
節以趨方驅馳於江滸千里而近阻奔走於門闌徒與
旄倪共深欣懌

賀陳右相啓

代張帥
十月

底績政途奮庸揆路濟巨川汝作舟楫式資利涉之功
若和羹爾惟鹽梅更賴均調之助廷揚顯冊風動綿區
竊以得賢為邦家之基論相乃人主之職旦奭股肱周
室適成夾輔之勲房杜佐佑太宗茂展相資之効偉真

儒之並用知景運之重熙恭惟某官學博而志周德全
而能鉅器稟廟彛之粹材隆國棟之雄直道而行養其
氣以剛大古訓是式尊所聞而高明久被眷於凝旒早
升華於從橐十年居外經綸蓋蘊於胸中一節還朝獻
納獨高於朝右粵由八座贊叅萬幾克壯其猷共推於
元老可以之業益表於賢人果誕布於榮書肆延登於
宰席儀刑四海豈惟黔首之具瞻鎮撫百蠻將見單于
之却立某章聯桑梓仰託陶鎔聞綸綍之初頒與簪紳

而胥慶望潭潭之相府莫遂鳧趨膽兩兩之台符第深
爵躍

同前

代吳漕

讀命宸廷登庸揆路旦夕承厥辟久叅輔弼之聯左右
惟其人就正燮調之任陶鎔伊始遐邇同歡竊以自昔
用人莫難置相內勤詢訪固常咨四岳以奮庸外盡招
延亦或使百工而求野惟其擇之既審是以授之不疑
自非真才孰膺大任恭惟某官直方而寬博肅括而疏

明智周事物之先學洞天人表嘉猷入告早承宣室
之知要路立登以扈甘泉之駕名聲藉甚忠烈巍然比
由常伯之班擢實前疑之列垂紳正笏益隆百辟之瞻
崇論竑言深得大臣之體宜正鈞衡之拜共調鼎鼐之
和聚精會神相得益彰密贊唐虞之主應變守文同歸
於治適觀姚宋之勲惟華夷永託於帡幪則事業有光
於簡冊某猥塵星使遙睇台符黃麻之似六經竦聽置
郵之命洪鈞之轉一氣願為躍冶之金慶幸攸深名言

奚究

謝執政啓

代人信陽軍到任

畢葵丘之戍偶道謹訶臨申國之疆復叨寄委有詔條
可以遵奉有民社可以施為雖號守邊實榮分土伏念
某羈單寡援坎壈多艱牽絲三紀之餘泛幕十年之久
捫參歷井飽諳蜀道之難輿轎控舟備習越人之戇晚
預題輿之列旋膺乘障之除臥鼓橐弓際會洗兵之旦
賣刀買犢招來復業之人乏善聚之可書獲代歸而為

幸敢圖紫詔存畀朱轡矧是封圻介於淮楚當周宣之
復古命召虎以俶城昔稱物阜而地偏今喜民淳而事
簡微躬曷稱洪造有歸此蓋伏遇某官道際天淵位隆
槐昴甄陶萬物頑金成利器之功橐籥羣生寒谷被陽
春之賜故雖遲暮未忍棄捐重念某生本江湖粗達閭
閻之利病仕經襄漢常安疆場之疲羸誓殫已試之勤
自詭惟良之政上則布宣於寬大下焉勸課於耕耘德
愧惠柔敢望邦人之咸喜効臻治理庶幾民俗之無愁

過此以還未知所措

賀湯右相修徽宗實錄成轉官加恩啓

奏篇乙夜宣制剛辰既峻陟於文階仍陪敦於書社巖瞻
愈赫輿議均懽竊以遠考漢儀序事獨尊於太史近稽
唐制修書爰董於相臣雖規模具著於舊章而制作實
隆於今日蓋舜孝有美墻之慕欲文謨如日月之昭哀
二十六載之先猷寫之琬琰使億萬斯年之載籍炳若
丹青自非名世之巨賢安得主盟於大典恭惟某官精

微而閔廓柔惠而直方以道德而致君以文章而入相
華戎帖泰禮樂脩明惟祐陵一代之貽謀以宜會粹顧
石室諸儒之廣記未訖編摩欲總宏綱是資茂宰一命
再命三命初循考父之墻大書特書屢書遂執昌黎之
筆歲時屬耳篇秩粲然銓次精詳無復段公之逸事搜
求浩博增多遷史之舊聞冕旒恭覽以褒嘉簪紱環觀
而誦嘆果疊頒於異數用寵荅於元勲某身在柳營心
馳槐位當誕揚於贊冊莫預班庭茲竊聽於邸音敢忘

賀厦傾依所積敷述奚殫

同前

代帥

太史成書廣庭敷號進二階之峻秩衍千戶之腴田豈
惟酬翰墨之勲抑亦重股肱之體竊考帝王之制具嚴
簡冊之規堯舜之蕩蕩鬼鬼捨典謨而孰見商周之灑
灑噩噩即盤誥而可知古既遠而才寢難史雖脩而文
或病馬遷之迄天漢尚頗謬於是非韓愈之紀順宗猶
有差於銓次欲前芳之獨掩捨大手以誰歸恭惟某官

精識幾神懿文貫道早懋賢人之業日親天子之光自
秉國均益孚民望以弼諧之餘暇提筆削之宏綱惟祐
陵神聖之資席我宗盈成之運克開厥後有二十六載
之貽謨皆聚此書欲億萬斯年之傳信既勒成於鉅典
宜寵錫於徽章某外剖麟符逖聞鴻渥莫展望塵之拜
敢稽贊喜之儀欣忭於中敷陳奚究

賀孟宗丞除江東運判啓

代漕

疇庸易部馳傳遵途顧此百城已稔風聲而胥畏有如

五枝亦資雲蔭以少安既內激於懼悰敢外稽於慶牘
伏惟某官懿文貫道盛德潤身才名獨秀於諸儒議論
早忝於前輩粵膺上眷久奉使華驅車徧歷於兩淮亦
云勞矣持橐尚虛於四禁曷不歸哉諒清朝已議於賜
環故近旬復榮於換節稍攄心計即阜民財某衰鈍無
堪夤緣有自告子文之政昔尚記於合符同士會之僚
今更慙於倚玉惟心所欲俟面以陳

賀王同知

以下代方卿

命錫綠綈樞分紫極帷幄倚運籌之畧華夷輳奠枕之
安竊以周設六官司馬聯於冢宰漢分三府太尉列於
公台逮我聖朝尤嚴兵柄權均文武豈惟委寄之不殊
府設東西蓋亦恩章之並厚克膺大任允屬巨賢恭惟
其官碩大而光明方嚴而樂易懿文華國拔象齒以稱
竒敏識絕人知騶牙之為瑞蚤結凝嚴之眷徧揚清切
之班紫誥黃麻司內外坦明之制赤文綠字述本文蕃
行之書聲名卓冠於在廷朝野共期於秉政果自文昌

之邃躡陞宥府之崇當波澄瀚海之秋寔伯偃靈臺之
際有常德以立武事靡勞南仲之師用真儒而歸侵疆
坐展仲尼之効某充員郎吏託庇鈞陶時糗糒於細柳
之營尚遙奉計陪簪履於翹材之館莫獲望塵惟欣踈
之交懷匪叙陳之能究

賀直院楊給事

塗歸東省倬直北門論事激昂百辟憚回天之力摛文
藻麗四方傳擲地之聲用既值才人斯贊喜恭惟某官

秀鍾西蜀名冠南宮浩然之氣靡屈於胸中蓋全所養
作者之名獨高於天下孰不知歸早游蓬萊方丈之山
旋歷原隰皇華之選逮聖主益新於庶政宜真賢還侍
於中朝進忝武部之聯入勸華光之講將延登於槐路
姑詳試於荷囊朝遊青瑣之闈時批紫詔夕對金鑾之
殿徐草黃麻極近臣稽古之榮彰治世隆儒之盛某猥
聞成命倍激懼蹤省戶為郎念夙依於宇蔭和門總賦
悵莫造於賓筵氣序暄和禁途清暇冀慎寢饗之節即

叅廊廟之崇頌詠於中敷陳奚既

賀禮部孫侍郎

道夫

啓

敷綸內史進位春官輟九寺之卿聯叅六曹之法從當仁
之慶有識所同恭惟某官秀稟岷峩聲馳京洛高文大
冊笑屑玉之盈車博物洽聞辦青絲之綸簡早榮集英
之第以隆宣室之知以二十年儒館之英才名籍甚歷
一萬里蜀川之守政譽藹然既詳試於外庸宜趣還於
中禁典銓文部莅職容臺茲回北道之轅遂挈南宮之

橐禮樂自天子出正資獻納之猷邊豆則有司存更賴
總提之力某遜聞成命倍激懼悚餘同楊給事

文忠集卷八十五

欽定四庫全書

文忠集卷八十六

省齋別稿六

宋 周必大 撰

啓三

並代作

賀陳知院

誠之

啓

以下代方總領
紹興二十九年

申頌鳳詔進長鴻樞班密亞於上台權寔專於左府機
衡有託廊廟增華恭惟某官道廣而用周氣和而節勁
學精黃卷究八儒三墨之歸文振金聲合六律五音之

奏自擢鰲頭之選即趨龍尾之階雙字峇堯藹著師儒
之望中臺奧突以居禮樂之司左符方部於清源名節
已頌於丹宸鑿坡視草胡公多典美之詞鄰境抗禮商
侑葭幾微之色方時偃武尤重弼諧延登兩地之尊叅
幹萬兵之柄折衝厭難豈惟薄海之無虞崇論竑言更
覺大臣之有體果被聖神之眷就陞宥宥之先示天下
弗復用兵丕贊周王之德使國人皆有所式正繫孟子
之賢光榮聳動於簪紳寄任愈隆於心腹某充員郎吏

託庇鈞陶方峙糧細柳之營阻曳履翹材之館

賀楊少卿

班集搢紳廷揚綸綍冠孤棘外朝之位旌鈞陳上將之
功注意加隆折衝彌遠竊以周尊祈父俾專督於爪牙
楚命太師實兼司於環列蓋事權之所寄宜爵秩之俱
高矧在熙朝愈遵舊典恭惟某官精忠貫日勁氣凝霜敦
卻穀之詩書脩寇恂之文武蚤逢興運親結睿知昔將
壇旌動之秋屢出平於邊隙暨瀚海波平之際遂入扈

於殿巖肅萬旅以無譁弼一人而有恪勲庸久著資望
至優將梁三組以垂腰雖隆異數奉世十年之居位宜
有殊遷爰稽二公洪化之勞併懋經武整軍之賞錫亞
師之新命仍徼道之舊權戟纛遙臨增賁普寧之鎮土
田申衍益開渝水之封用光帶礪之盟式表旂常之績
某夙瞻威範適總軍儲望緹騎於章溝莫陪賀客窺黃
麻於奏邸徒極歡悰

賀戶部趙侍郎

令詠

啓

釋符越嶠持橐漢庭二千石之惟良入補六卿之闕三
十年而制用悉提萬貨之綱法從得賢輿情交慶恭惟
某官學高歆向德茂間平蚤奮勵於宏材寔踐揚於煩
使轉輸東廣素推抑強扶弱之稱澄按南閩尤得戢吏
愛民之指寓書林之美職鎮澗水之近藩資與望優譽
隨日至賜環趨覲甫瞻天子之光鳴玉會朝已率地官
之屬方資心計式阜邦財始末源流豈析秋毫之小利
優游瞻足固殊畫餅之空談少施鞭笞之勞即贊棟隆

之輔某久馬仰斗邈爾披雲省戶司珍仰繫於館鑄轅
門總賦又托於悒懔欣幸攸深名言奚究

賀魏宣州啓

書頒一札夢應三刀起異時廊廟之宗工付今日股肱
之巨鎮印符甫至條教已孚恭惟某官華國文高經邦
道廣溫溫自克如琮璜可薦於郊丘凜凜後凋若松栢
靡歆於霜雪早翱翔於兩禁旋總攝於三銓屢煩仗節
之行首定和戎之利帝以勲書竹帛趣填京兆之沙公

方志在烟霞高揖浮丘之袂逮宣室深思於賈誼俄延
英復名於裴公圖回大政之元剗草積年之弊遽援祖
宗之故事力祈中外之迭居已勤越嶠之鎮臨更屈宣
城之藩翰雖云新治時乃舊游既民情風俗之周知宜
德望恩威之素洽暨湯咸有一德寧以外哉惟說命總
百官即延登矣某夙叨造化喜聽絲綸職在兵儲莫展
朱轡之雅拜心依鈞播但遲赤舄之邁歸欣頌交懷叙

陳奚究

賀兵部湯侍郎允恭改除戶部啓

命出宸衷班升法從求懿德而肆時夏方叅武部之聯
歌南風而阜吾財就正地官之任事權增重眷獎彌隆
恭惟某官氣和貌粹而濟以剛學膽詞精而貫乎道入
儀三院凜然形寒諤之風出應二星籍甚得中和之譽
書接來從於蜀道辰猷歸告於周行惟偃戢五兵靡藉戎
昭之經畫而低昂萬貨實資心計之幹旋用頒進陟之
恩式示登庸之漸某久勤仰斗未快披雲省戶司珍仰

繫於館鐻轅門總賦又竊於幘幪聞成化之誕揚激懦
衷而增喜三庚云伏九夏將闌用調鼎食之和佇俟堤
沙之築其為欣頌罔究敷陳

賀葉侍郎

祇拜明綸就升橫榻霜凝憲簡獨高峩豸之班風動朝
紳咸避乘驄之節正臣既進公道愈開恭惟某官學造
天人文叅典誥以誠慤靖共之操濟輝光篤實之資方
彈貢禹之冠推輪攜軌俄請朱雲之劍砥柱頽波遂以

精忠簡於淵聽迨久更於外服始歸列於中朝議禮奉
常兼官華省旋暫持於龍節即入選於烏臺勁氣橫秋
鷲乘風而直上姦萌掃迹雪見睨而自消果膺雄劇之
除益展剛方之志舉臯陶而不仁遠姑坐振於憲綱用
仲尼而侵疆歸竚進叅於機政某依仁有日去德幾年
瞻佩印之騶雖阻陪於賀客扣典籤之吏顧敢緩於緘
書欣抃於中名言曷盡

賀吏部賀尚書

先奉贊書峻躋常伯事叢任重實通四選之權地近班
高獨處六曹之長者英登進遠通權傳恭惟某官學際
道真才周王佐秉資和裕如春風醇酎之可親遇事激
昂真烈日嚴霜之難犯脩名早立要路久登雖中年自
樂於燕閒而正宁不忘於簡注比開公道亟列禁塗議
禮秩宗明春卿之舊典升華瑣闥振夕拜之頽風榮紬
石室之書入勸金華之講賀公兩命既遠繼於家聲甘
茂十官宜存承於帝渥粵從衆望擢冠適聯惟茲典選

之除自昔奮庸之漸周書分職列冢宰於天官唐制任人兼吏銓於相府行叅大政用協前規某猥預郎潛寔依河潤屬和門之總賦阻賓閣之望塵欣頌於中敷陳奚究

賀兵部周侍郎

策勲西省進位中臺事簡班高名列文昌之司馬職親地禁寔兼翰苑之主人命出自中權均於外恭惟某官學海淵澄而百家並蓄文鋒峻拔而八面可當自稱首

但知均節於陳紅仍復鈎稽於朱墨再期於此片善則
亡姑容逃司敗之誅已為忝冒乃使綴介卿之位何以
堪任茲蓋伏遇某官默運洪鈎茂凝丕績輔成皇極無
偏陂以遵王叅繹師虞有謀猷而告后俯眷棘門之吏
嘗陪材館之賓播物何私雖徧加於庶類回春有信常
首及於朽株遂使微蹤坐叨優數某敢不仰銜搏埴益
勵鈍頑非惟圖稱於詔除庶亦免貽於簿責掌九賦九
功之貳固慙周典之官有萬鍾萬室之藏願助齊軍之

政過此以往未知所裁

謝吏部賀尚書啓

以下代帥

支郡分麾方飲冰而就道陪京易地旋出綍以示恩伏
念某早筮周行以聯法從主恩未報自驚蒲柳之衰家
難遽纏徒抱栝樅之慕逮祥琴之甫御嗟欒棘之僅存
逝將歸老於山林何意辱憐於旒宸甫憑熊軾俄昇麟
符豈伊譎薄之姿堪此頻煩之寵茲蓋伏遇某官儒林
宿望禁路老成瑣闥高論駁之稱銓部著清明之効紬

圖書於石室冠講讀於金華視君如腹心屢罄嘉猷之
告相王為左右即聞大政之咨衆賢咸賴於主盟朽質
亦叨於推轂某敢不布宣德意安靖兵民雖愧齊侯政
亟成於三月尚追嚴助計可奉於三年感幸居多喻言
奚既

吏部葉侍郎啓

訪京口之舊游甫祇成命易秣陵之新組更冒除書卷
此會藩號為劇寄任九郡兵農之責全藉撫綏司一時

管籥之權必歸信謹而某罷資甚陋才力勿彊自經憂
患之餘尤覺精神之耗忽叨宅牧大懼瘵官誰為汲引
之謀豈有夤緣之助茲蓋伏遇某官宏猷經遠碩學造
微鶚立臺端議論動關於大體鳳儀禁路銓衡不愧於
昔人史闡高譔次之功經幄致緝熙之益多士每資於
借助孤踪遂致於叨榮增秩賜金雖乏潁川之治搯刀
製錦尚逃鄭國之譏感幸居多喻言奚既

吏部沈侍郎介頌德

茲蓋伏遇某官文華緯國術業康時自連揖于賢科即
高蹇於清路六卿率屬既登貳於天官三格脩書復茂
明於皇統當論思之餘暇推獎借之公心遂致陳人猥
膺遴選民安渤海願希龔遂之風福及京師更効細侯
之政其為感幸豈易多言

戶部趙侍郎頌德

茲蓋伏遇某官儒猷節吏忠槩光朝早踐歷於劇煩浸
發揚於譽問幹旋版部方追晏選之風丞弼政塗行表

間平之績當論思之餘暇推獎借之公心遂致陳人猥
膺遴選發奸摘伏雖有愧於古人宣化承流尚勉追於
循吏其為感幸罔既名言

兵部楊侍郎椿頌德

茲蓋伏遇名先多士望重一時徧更內外之華彌東聖
神之眷中臺東省迭躋法從之清班西學北扉備極儒
臣之榮遇爰以論思之暇曲推獎借之言遂致陳人猥
膺遴選民安訟理倘少助於中興政拙心勞顧敢辭於

下考其為依向實倍等夷

刑部黃侍郎

祖舜

頌德

茲蓋伏遇某官材堪國棟學貫經邦早占郎位之星晚上禁塗之轍臯陶之弼五教允賴明清蕭何之作九章更資刊定爰以論思之暇曲推獎借之言遂致陳人猥膺遴選竭其智力固無赫赫之名假以歲時或効平平之策其為依向實倍等夷

工部侍郎

晞亮

頌德

茲蓋伏遇某官詞章辨博器宇恢闓以訓導於成均旋
雍容於宰士擢登法從姑董正於百工參預政幾即圖
回於萬務爰以下同前

周給事啓

秩二千石於南徐方被自天之命付十九符於建業謨
頒易地之恩觸熱到官涓辰視事言念庸虛之質久叨
獎擢之榮持橐甘泉鼠易窮於五技擁麾炎海馬幾敗
於百鈞逮纏風木之悲甫畢苴麻之制驟司宮鑰深愧

梁鵜茲蓋伏遇某官名冠兩科身兼數器屢告辰猷之
益峻躋夕拜之聯金匱紬書述作何慙於遷固玉堂視
草才華寔僣於常揚俯眷孤蹤每推餘論遂致詔除之
寵薦分閫制之嚴坐撫軍民既竊蕭公之任兼容獄市
願師齊相之風感佩之深叙陳奚究

中書洪舍人遵啓

一麾出守方便道以之官十國為連復冒恩而易鎮惟
金陵之奧壤實江表之名藩人物浩繁蓋南北要衝之

地江山佳麗號古今形勢之區孰謂孤踪可司留鑰此
蓋伏遇某官家傳勁節名冠殊科演誥西垣鼓天地中
和之氣宣猷右府助聖人道德之威爰於獻納之餘借
以揄揚之助肆容異寵洵及非才殿天子之邦既仰塵
於任使在諸侯之選願追繼于循良

起居張舍人頌德

此蓋伏遇某官望隆國士名冠儒科召舉必書久珥螭
坳之筆王言作命兼裁鷗閣之文爰於獻納之餘借以

揄揚之助云云

朱侍御啟

北固承流方飲冰而就道金陵易鎮旋出綍以䟽榮任
愈重而才微寵既深而懼集伏念某久聯冗從積愧空
餐曩分竹使之符遽失蘭陝之養琴既聞於切切棘猶
嘆於欒欒敢謂誤恩曲憐舊物中詔亟頒於銅武半塗
復畀於玉麟誰為推挽之謀豈有夤緣之助此蓋伏遇
某官學窮聖祕智蘊賢謨右省拾遺首膺於親擢南牀

執法大振於直聲，剖明蓋稟於天資。風采獨高於朝路，竚陪幾政用展壯猷。方臺評務別於忠邪，故閫制靡遺於衰朽。某敢不勤求民瘼，力報主知。及馬問羊，雖愧子都之智；帶牛佩犢，願回渤海之風。感佩攸深，指陳奚究。

任殿院頌德

此蓋伏遇某官稟資勁正，造道深醇。粵從分察之聯，就進副端之職。鸞乘風而直上，衆正咸依雪見。覲而自消羣邪，遠屏竚陪幾政用展壯猷。

汪察院啓

三年銜恤僅畢素冠十國為連遽膺丹檢惟秣陵之與
壤實岳狩之別都人物浩繁據南北要衝之會江山雄
偉號古今形勢之邦孰謂孤蹤可當遴選茲盖伏遇某
官稟資端慤植操剛方芸閣校讎萬卷默藏於胸次楓
廷奏對一言密契於宸衷暫司糾察于六曹行振抨彈
於兩院曲推餘論猥及陳人俾從憂患之餘亟冒蕃宣
之寄某不敢不奉揚德澤綏靖兵民上以酬聖神再命

之榮下以慰一方父老之望其為依向實倍等夷

任察院

文薦

頌德

茲蓋伏遇某官氣和節勁道廣用周以淵源之學貳曲
臺以敏濟之才游銓部擢登烏府方觀糾察之功進發
獸樽竚展剛方之操曲推餘論猥及陳人

下同汪察院

左司諫何

溥

頌德

茲蓋伏遇某官名魁俊造望冠簪紳烏臺躋六察之聯
騎省綴七人之列后從諫則聖方資論議之公臣事君

以忠即預弼諧之峻每推餘論加賁孤蹤遂叨獎擢之
榮薦冒蕃宣之寄

都正言

民望

頌德

此蓋伏遇某官河山稟粹金玉凝資烏臺分糾察之權
騎省振彌縫之職謀猷告于后既結異知左右惟其人
即膺巨用某敢不敷揚德意安靖封圻

賀鎮江鄭直閣

作肅

啓

榮升中秘來剖左符遙分東壁之光增重南徐之寄恭

惟某官器質寬博問學精深憲臺高糾察之稱卿寺著
委蛇之節久從外補殊鬱遠敵方公道之宏開宜舊人
之復用宣室之思賈誼將承前席之咨馮翊之試蕭生
尚仰本朝之志紛旗旄之載路儼輜蓋以臨民方丈蓬
山兼寓圖書之直西樓月觀更雄江海之觀某適此充
員於焉託庇鄰封在望知富燭之可分餘潤旁沾何上
流之不及其為欣幸固罄喻言

賀辛福州

次膺
啓

擢從藩郡盡委連城尺籍伍符新元戎之節制油幢畫
戟增舊履之光華恭惟某官浩養積中懿文彪外早以
劉方之操揚于諫諍之聯躋屢紀於皂囊箴尚留於丹
宸仲山補袞惓惓惟王道之陳佐治引裾挺挺有祖風
之繼久抱江湖之興比陪簪橐之遊方觀接武於夔龍
乃復希蹤于召杜謂一圻布政未足究于遠猷故八郡
宣威庸就分於外閫事權加重眷獎彌隆惟望寔之素
孚諒撫綏之有裕民之攸暨既興豈弟之謠王曰邁歸

即蓬弼諧之列某傾風惟舊託庇在茲幕府宏開帳莫
陪於賓謁緘書遠致姑自竭於誠心瞻詠于中敷陳奚
既

賀閩中提舉周郎中操啓

請外抗章臨軒授節朝士嘆急流之退海邦瞻膚使之
華恭惟某官重厚有常䟽通無滯素蘊淵源之學進逢
休顯之時雙宇岩堯久授絳紗之業中臺親切首含錦
帳之香逮兼宰士之聯將綴從臣之籍力祈去國爰昇

乘輅北苑靈芽獨幹阜通之利南州陳粟坐收歛散之
功惟清朝正急於掄材顧雅望難稽於持橐甫濡壯轡
即返駕班某稔風聲於多士之間託雲庇於鄰封之內
高山在望未降既見之心尺素可傳少叙願交之意其
如悃幅難盡名言

賀閩漕王敷文

時升

啓

聯華六閣按漕七閩輟卿月於周行煥使星於劇部睿
知厚甚輿論翕然恭惟某官秀稟山河德全圭璧飭躬

以有用之學應務以不羣之才曩自民漕出專軍賦足
兵足食功高細柳之屯如縉如綸寵進大農之貳將峻
躋於禁路庸詳試於外臺南國觀風益著點鞭之算西
清寓直更增攬轡之光諒玉節之方持已璽書之來下
某傾心德宇託記寶鄰未容布武於門闕敢廢將誠於
竿牘其如欣頌難盡名言

文忠集卷八十六

欽定四庫全書

集部

文忠集卷八十七

詳校官庶吉士臣李傅熊

主事臣呂雲棟覆勘

總校官進士臣楊懋珩

校對官學正臣李巖

謄錄監生臣沈立銘

欽定四庫全書

文忠集卷八十七

省齊別稿七

宋 周必大 撰

啓四

並代作

上湯相求嶽祠啓

以下代王仲寧紹興三十年

潭潭公府萬方共竊於帡幪兩兩泰符一介未瞻於焜
耀屬炎燠正行於夏令而清薇穆布於薰風遙知廊廟
之靡容密授神明之仗助寢饗有裕戩穀無窮恭惟某

官正直秉彝誠明貫道博通當世仲舒有王佐之才重
任在躬伊尹先天民之覺早富碩大光明之業徧儀清
華嚴近之聯深結異知驟膺大用懋展經綸之志追還
晏祭之期以士民則臻淳古之風問夷夏則底緝寧之
効豈特稽載籍之內名莫與雙蓋常考中興以來功居
第一矧謙德之滋茂視治功而弗矜惟江河之量有以
推其心故草芥之微淄以伸其喙伏念某周鄉賤士顏
巷寒生臃腫不才真鄧林之棄物疲駑無用乃樂廡之

贅疣雖知屈首以授書殆類索塗而擿埴偶延世賞獲
綴仕途旋由銓部之試程俾主金陵之簿領舟車非遠
俸廩亦優昔云幸而得之今乃有不然者親庭萬里方
游蜀道之難子舍一身敢顧臺城之樂居則念違於色
養行馬慮過於官期徘徊累月之間拘畏踰年之罪與
其鬱方寸之懷而嘆羝羊之觸孰若丐尋常之水而希
轍鮒之濡用瞻赫赫之師脩罄拳拳之懇願回鈞造特畀
岳祠庶往來吳蜀之郊私心遂矣而積累歲時之閱寸

進隨之肺肝永誓於銘藏父子共圖于報稱仰干威重
伏俟誅夷

得嶽廟謝宰相啓

陳情伏惟某官篤學自其天資雄文追於古作三十年
之外補不忘存魏之心一萬里以遐征嘗歷渡瀘之險
既踐揚之滋久宜望實之交孚比自外臺入儀雙宇詞
章議論蔚為西漢之儒宗耆舊風流猶是正元之朝士
萬乘首嗟於見晚諸生咸快于覩先曾芳歲之未周果

荷橐之申錫人惟求舊姑小試於吏銓道之將行即峻
叅于揆路某依仍久矣聞問欣狀屬司宮鑰之嚴莫展
賓閱之慶惟深頌詠因既敷陳

同前代人

詔褒壽雋位列禁塗國子先生已著作成之効天官小
宰正資鑒裁之公上眷至隆人言無間恭惟某官鍾英
靈嶽藹譽儒林堯釀舜醺粹矣淵源之學周情孔思晔
然黼黻之文早被選掄屢戡盤錯叱馭靡辭于西土埋

輪幾徧于中州歲適凝寒獨見堅剛之操時方更化宜
先耆舊之圖暫假道于賢關果升華于法從矧是銓曹
之要實為政地之儲蓋為國求賢既已坐清于流品則
得時行道自能叅幹於鈞樞揆理必然指期可俟某昔
叨聯事今領除書憶別浦之班荆未周歲月仰明庭之
持橐恍隔煙霄惟欣頌之交懷匪叙陳之能寃

賀禮部侍郎曾幾啓代帥

先膺書贊進貳儀曹陪紫橐之近班寵清時之宿望伏

惟某官氣全剛大學造深醇有令聞廣譽而施諸身識
前言往行以蓄其德先朝涵養早忝麟索槐市之聯
上聖選掄屢付龍節竹符之寄比圖壽雋再踐周行
方總羣儒明二星於東壁俄升宗伯亞八坐於文昌陳
情甚切自通公台管記之前加惠至渙俾綴嶽鎮祠官
之後寬僭煩之大戮狗省侍之寸誠埏埴恩隆銘藏志
極竊以重莫重於三旌之位微莫微於九品之官既霄
壤之勢分宜鑪錘之理絕三上書而不報昔馬事有至

難一出言而遽從今也談何容易蓋上相擴至仁之政故匹夫無不獲之私伏念某資本妄庸迹仍闕阨既才力難充於晏御何姓名敢徹於膺門昨以賞延許親簿領雖官期之浸邇顧親膝之滋遙中實傍徨勢惟怵迫念終始受恩之厚誠無越于大人則恢宏播物之功必不遺於小子用瀝肺肝之懇自投鐵鉞之誅豈謂竿牘甫聞甄陶已暨俾釋鈞稽之繁劇容忝卜祝之優閒家請官供坐竊代耕之祿冬溫夏清行趨學禮之庭一被

洪私兩諧素願此益伏遇某官道公毋我德大有容象
極承天直運四方於掌上垂紳正笏克應萬變于胸中雖
彌縫輔贊之莫窺而汲引招賢之可考九名片善已悉
指使某敢不靜言厚幸之來推本曲成之自寬仁傑太行
之顧將歸覲于嚴君反翰林蜀道之難願追踪於前輩
其如報効何悼靡捐

賀葉樞密啓

代人正月

紫誥誕頒黃樞對掌萬乘仰成於宥密四方屬望於安

疆竊以周設六官司馬聯于冢宰漢分三府太尉列於
公台惟聖神參考於前規肆文武平分於大柄正資
元老協贊多盤恭惟某官道大才全器閎量遠鏘鏘鳴
鳳覽德輝而下之濯濯祥靈為聖人而出也名實素高
於中外眷知特異于臣鄰方其居副端橫榻之時固已
有二政秉鈞之意小紆軌轍大振銓衡至于攝八座之
崇資修三朝之信史既踐更之畧徧右登用以何疑遂
自甘泉進儀右府武有七德莫先禁暴豈惟逆折於遐

衝天生五材安可去兵正賴坐恢於遠馭英髦大任軍
國咸依某久辱顧存欣聞冊拜漢得子房而勝千里竦
聽運籌魯用仲尼而歸侵疆固知奠枕其為忭躍未易
敷云

賀同知葉樞密

義問

啟

以下代監司

誕頒宸綍登貳幾庭光動斗宮暎泰階之兩兩威行夷
裔知四海之皇皇恭惟某官氣和貌粹而濟以剛學瞻
詞精而貫于道凜然松柏靡容霜雪之欺粹若琮璜宜

備郊丘之薦結綬即持於正論剝纓久歷於要津比逢公道之開連錫召音之寵朱繩勁直振西院之威稜金鑑清明澄三銓之流品紬圖書於石室贊講讀於金華時譽益隆主知彌厚謂安危注意莫先樞管之權惟文武憲邦可補廟堂之缺是資一德進本萬兵既望實之素孚宜邇遐之歸重用孔子而無敵天下古有成言得留侯而運籌帷中今觀顯効某充員外計托跡大鈞瞻蔽芾之棠蔭敢忘封植想深嚴之槐位正賴陶鎔欣幸居

多指陳昌喻

回宣州朱舍人啓

政成嚴瀨命易宛陵前導後隨紛千騎旗旄之衆去思
來慕沸兩邦謠頌之聲恭惟某官詞章為王度之華聞
望作士林之冠西省早資於獻納南箕俄侈於簸揚韓
愈之訪曲江屢形絕唱子牟之存魏闕愈勵孤忠逮公
道之宏開宜左符之薦畀郡守民之師帥舍人士之典
型疊嶂岩堯阻奉謝公之樂朶雲娟妙喜披韋陟之書

欣幸居多指陳罔喻

賀周給事啓

拜恩玉陛平奏銀臺名參黃散之班任極清華之選初
傳除目允協輿情恭惟某官德冠淵騫業窺稷契讀三
墳而博古度兩漢以摛文翰墨策勲久矣中朝之第一
忠精事上居然當世之少雙方靈臺收偃伯之功顧武
部豈盡才之地疇咨碩望封駁瑣闥元素回天魏鄭嘆
仁人之論李藩批勅裴公推宰相之風既茂著於多庸

諒難淹於大用某外將使指阻慶賓筵鄂鄂常聞仰家
聲之復振期期靡奉視祖德以何慚欣慕居多叙陳奚
究

賀岳都統

超

起復啟

以下代人

紫綉頌恩墨線泣事仰至情於苦出增壯觀於貔貅上
眷至隆師言允穆恭惟某官忠精拱極氣概橫秋山濤
靡學於孫吳默究孤虛之要葛亮自方於管樂孰窺智
畧之奇隱然賢過于長城儼若形圖於烟閣方慶堂萱

之茂遽纏風木之悲雖孝思慕曾閔之誠力祈上印然
國典有漢唐之舊難狗倚廬既奪哀麻卽頒節鉞其密
聯王事敢緩郵籤惟欣頌之交懷匪叙陳之能究

同前

起從苦次復總戎昭將士騰懽旗旌動色伏惟某官學
通三畧智達六奇執戈衛社於薄伐之初經武整軍於中
興之後綵衣終養固殊蓼蓼之莪要經惟憂遽嘆藥藥
之棘顧制閭方專于一面豈呼門可待于三年是資移

孝之忠用舉奪情之禮方圖往記首辱飛文惟欣感之
交懷匪叙陳之能究

賀池州周侍郎

執羔

啓

灼龜諏日分虎臨民畫戟前驅奉板輿而增煥甘棠甫
憇鄰梓里以交輝善政一敷謹謠四達恭惟某官識窺
聖秘知覺民先以英詞登鼎甲之科以直道結宸旒之
眷徊翔九寺典領三銓旋由宰士之要塗寵拜秩宗之
近列懷章出鎮寧辭蜀道之難引綬未歸頓覺長安之

近况此邇封之易治又何游刃之足勞即頌一札之書
趣正三槐之位某辱知素厚別德寢深獻薄技于春闈
敢忘衡鑒望高旗于秋浦幸託悝懽方脩賛喜之書俄
枉鳴謙之問其為欣悚交集襟襟

同前

以下代帥

敷綸內史改名藩以簪橐之舊臣鎮扮榆之鄰壤教
條誕布民吏咸歸伏惟某官識炤幾微學該象數道逢
辰而日顯才遇事以風生自服周行寢儀榮路六卿分

職論思默著于春官十國為連鎮撫久勤於蜀道北上
便親之懇果疏易地之恩近尺五之天既易彰於政化
旌二千之石當入補於公卿言念哀蹤夙叨雅契遠披
尺牘喜聞四牡之徂齊密映上涼更賴餘波之及晉其
為欣幸莫究敷陳

賀吏部周侍郎縮啓

寵頒帝制擢貳天官日趨龍尾之階名列雞翹之從文
昌惟中興議禮之秋且大報躬郊之歲假塗禁路姑蒐

輯於上儀論政法宮即咨詢於故老某傾風舊矣聞問
欣然屬司晉鑰之嚴莫展高閣之慶其為頌詠固罄敷
陳

同前 代人

輟從中秘峻貳春卿雲起蓬萊坐遠三山之路風清閭闔
日趨九陛之朝恭惟某官懿行服人清徽映世塞旌書
府誦河東三篋之亡振漆詩壇繼華黍六篇之補粵從
壯歲亟踐要津擅才名者四十年騰扶搖者九萬里比

辭熊軾入冠麟臺既冕旒東注之彌隆宜簪橐論思之
有賴矧測圭於日至方踐豆於國南非鴻儒不足以練
習祲容非耆德不足以相成熙事上心所眷物望攸
歸與弟子以起儀暫資制作圖舊人而共政即贊燮調
某久仰英猷竦傳成命舜庭在望雖阻聞四岳之咨周
禮既行尚及見兆民之阜欣愉備罄敷寫奚殫

賀浙西謝提舉

叔

啓

代帥

積歲奉祠阻遂朋簪之盍晚塗制閫幸叨鄰燭之分念

霜臺繞數舍之遙而記室乏尺書之問忽傳音驛倍激
感怵伏惟某官學術深醇性資夷雅庭蘭擢秀世傳康
樂之風池草摘華人誦惠連之句懿行早儀于星省洽
聞旋贊于月卿雖久安勝地之游然常在明臣之日起
膺郡寄四民騰豈弟之謠就陟使華一旦展清澄之志
既長安之日近佇宣室之席前秋令云初商飈已屆冀
慎寶調之節進迎禁從之除頌詠攸深名言奚究

謝舉自代啓

代漕

某伏聞台慈薦某自代者國家眷求偉望擢寘禁塗每
准就職之初申以舉代之制豈特觀其引類抑亦廣於求
賢侍郎以豐沛之故人叅嚴徐之侍從胸中涇渭清濁
奚逃皮裏春秋智愚坐別茲由版部改貳夏官謂宜博
選於實材庶幾靡負于推轂某之無似衆所共知意甚
廣而才踈力雖多而効寡早陪諸彥妄意事功中值多
艱甘心流落比宥開于公道蒙起廢于偏城旋被選掄
猥叅漕輓坐閱再時之久曾無寸効之聞不稼取禾自

知明甚拔茅連茹豈所當然敢期過採于虛名特與榮
加於刺奏星星雙鬢懼莫稱于吹噓炯炯寸心顧豈忘
於荷戴

賀戶部邵侍郎啟

以下代人

正位版漕升華禁橐司徒掌邦教式資安擾之功南風
阜民財更賴幹旋之術允聞成渙無復間言恭惟某官
行應時湏識明政要以游夏淵源之學兼由求果藝之
才雖洶洶風波能使帆檣之暫偃然森森松栢豈因霜

雪而遂歆逮上聖之灼知眷名儒而復用皇華外歷
宰士內聯既久陪文石之班宜入扈甘泉之駕豈特擇財
經武坐令萬貨之饒固將足國裕人仰副九重之意某
屬縻近甸阻蓬崇墉侍從得賢喜符同于公論庇庥託
跡尤慰愜于私情

回新江東王運幹渙啓

暫屈長才來禪外計辱書郵之為好知祖道之涓休伏
惟某官懿行純全雋聲清泐孔庭學禮久窺禹穴之竒

儉幕泛蓮將訪秦淮之勝雖素志務安于平進而清朝
正急於詳延試語椽于江東既攄婉畫空馬羣於冀北
行肅召音某積歲傾瞻指期晤對想方勤于行邁異益
保于冲和欣頌交深名言奚盡

與新總領啓

代方少卿

陞班省闈董賦轅門內倚重于名郎外增華于膚使除
書一布輿頌四傳恭惟某官蹈德冲和摛文敏瞻自寧
惟於仕路即掉鞅於榮階剖竹臨民屢紀循良之績握蘭

典選獨高簡要之稱輟自周行往臨禹會既澄清之効
著亦歛散之政修陟明將筮于從班錫寵更膺於劇寄
仍文昌之峻職調武旅之餘糧士飽而歌益壯軍聲之
十萬人圖其舊竹觀海運之三千某久愧空餐茲勤揚
糝祇膺嚴召固難俟駕而行載篋來音或許合符而去
其為欣懌難盡名言

賀孟少卿

忠厚

判平江府啓

代外舅

揚庭讀命析爵分符左九棘之崇班既資寅亮右扶風

之近郡復賴蕃宣溫詔郵傳嘉師栢悅恭惟某官望隆
朝野道際天淵貴窮百執而秉德甚謙祿極萬鍾而提
身彌儉自解黃樞之柄久從綠野之遊四牡孔脩方趣
韓侯之入覲周邦咸喜旋觀申伯之還南進寵秩於亞
師聳多儀於三輔神旗豹尾掩畫戟之前聞絺冕篆車
視朱轡而有煥稍奏裕民之最即歸秉國之均某方伏
衡門欣聞盛事賜郭氏三公之服已見班春為滕文一
屢之氓敢忘賀履青陽駘蕩玉節逶迤願精茵鼎之調

俯慰旄倪之望

回交代除郎官啓

以下代郡守

比叨郡寄實踵英猷瞻之在前方嘆所立之卓爾矚乎
其後遂將交臂而失之欽惟一節之趨已奉九門之對
神明所相戩穀來宜恭惟某官麗漆瓊敷英規玉立高
文大冊早決殊科亮節貴名久儀要路方報桐川之政
俄歸蘭省之班諒甫閱於歲陰即進叅於泐從眷言朽
鈍久濶風標雖合符許續于銅魚而騎氣已登于金馬

不圖華翰先賁孤蹤聽清廟之朱絃但知三嘆聞江都
之正義請頌終身

回教授啓

早並鄉扮接英游而舊矣晚分符竹聯王事以欣然未
脩一紙之書先奉五雲之翰伏惟某官氣由直養業以
勤精中坦外莊士皆無怨而無惡左仁右義志欲有猷
而有為方將校三館之芸聊復采泮宮之藻欽惟聖世
彌重儒官大器猶規矩準繩固非俗吏之為也四維乃

禮義廉恥必招諸生而誨之自慚假守之非才預恐化
民之無術實賴範模之正助成師帥之功晤語非遙瞻
言更切

賀周內翰麟之啓

代監司

疏恩中禁正位北門仙嶺提鰲應久虛之妙選王人馳
騎舉迅召之彛章都邑聚觀簪纓聳嘆恭惟某官炳靈
河嶽範質珪璋文與道俱故作者之名獨高于天下氣
由義集故浩然之養不屈於胸中早連揖於魏科旋徧

更於要路自游東觀已攝西垣視周漢之文章可無愧
矣如常揚之制詔其猶劣諸比升封駁之聯兼寓凝嚴
之直朝居青瑣回天嘉議論之公夕草黃麻擲地美聲
音之振逮茲真拜時乃異知名專翰苑之主人實冠清都
之侍從王言之有七制是亦假塗冢宰之正百工即聞
當路其屬縻外計阻造崇墉離欣懌之在中匪叙陳之
可既

同前

代人

輟從東省擢正北扉滿一歲而為真式稽漢制侯五甄
而入直增煥唐儀自非傑出之英孰應久虛之選恭惟
某官道該衆善學總九流笑談連揖於賢科烜赫浸彰
於令問九曰清華之地孰不踐揚顧如粹雅之辭時皆
傳誦久獨司於鳳掖旋寓直於鑾坡博物洽聞考近世
莫能及者高文大冊雖古人無以過之宜被寵於中宸
特升華于內相竊考簡篇之故實茲為廊廟之權輿盖
雍容日侍于禁嚴故咨決倫聞於議論班高內宴既先

一品之官禮絕同僚行踐王公之任某逖聞成命倍激
懽悰黃麻之似六經方觀制作洪鈞之轉一氣即預埏
陶欣頌攸深叙陳奚既

賀中書舍人

孝祥

啓

代漕

光膺書贊就正詞垣紅藥蒼苔重詠鳳池之鳴佩青春
紫綬共觀淮海之俊人除目遠傳輿情胥悅恭惟某官
材資卓越器範粹精學博而精有若總龜之聚文雄而
峻不殊逸驥之馳自擢冠於大廷即躡登於要路校讎

麟省記注螭坳稟然廊廟之姿籍甚簪紳之譽五花判
事既久蕙寓直之榮六押分員宜寵錫真除之命恩章
特異眷簡彌隆紬繹典謨方且上規于姚姒推明德意
豈惟近比於常揚諒無歲月之淹亟貳機衡之峻某猥
忝漕輓實賴庇庥逃聞成渙之頒阻綴賀賓之列其為
欣懌莫究敷陳

同前

監司

疏恩禁幄正位綸闈叅法泛于甘泉豈特妙儒臣之選

敷聖謨於寰海又將為王度之華喜動羣工光生四戶
恭惟某官詞鋒峻拔學殖崇深冠時髦于談咲之間躋
榮路于休明之際君臣契合視前世以少雙德業恢闕
號中朝之第一自秉螭坳之筆即裁鷗閣之文紅葉翻
堦昔既勞於久假紫薇伴直茲果慶于為真畫三接
以方來歲九遷而未艾灑灑噩噩始上追二代之書業
業兢兢即入贊萬幾之政某外將使指遯望賓堦雖莫
遂于趨風顧敢稽于贊喜其為欣懌難盡名言

文忠集卷八十七